



Karakteristike islama kojem pozivamo

Islam kome mi pozivamo i koji želimo uspostaviti u sebi, da bi bio uspostavljen na Zemlji, ima svoje karakteristike i osobnosti. Svako danas poziva islamu, onako kako ga razumije. Žaloso je da svako smatra kako je njegov islam jedino ispravan. A islam je samo jedan. Onaj sa kojim je Allah zadovoljan i kome je pozivao Poslanik, s.a.v.s. Islam Kur'ana i Sunneta. Ne znam tačno ko je izgovorio slijedeće riječi. Nije ni važno. Važno je da su mudre. Naime, neko je rekao: "Dobro je da sam upoznao prije islam, nego muslimane, jer da sam upoznao prije muslimane, ko zna da li bi ga prihvatio"! Opet, neko drugi je rekao: "Kakva bi to bila vjera, kad bi imala ljude"!

Dakle, islam kome mi pozivamo ima slijedeće karakteristike:

1. Islam se obraća razumu, na njega se oslanja u razumijevanju i shvatanju dina i izgradnji dunjaluka. I ne postoji proturječnost između slobodnog razuma i autentične tradicije. Islam postiže na znanje i naučna istraživanja, prihvatajući sve što je korisno za čovjeka, a ne dolazi u koliziju sa islamskim principima. Izučavanje svake nauke koja je potrebna ummetu je obaveza svakog muslimana i muslimanke.
2. Islam postiže na zdravo rasuđivanje i inovacije. Suprotstavlja se učmalosti i pasivnosti. Podržava svaki koristan razvoj i napredak. Islam ima rješenje za svaki problem, a stvar je ljudskog razuma kako će doći do tog rješenja. Zato je idžtihad farz i potreba ummeta. Vrata idžtihada su otvorena pod određenim uvjetima.
3. Islam se odlikuje umjerenošću u svemu i smatra to temeljnom osobinom islamskog Ummeta. Islam želi uspostaviti ravnotežu u svim segmentima: Ravnotežu između duha i materije, razuma i srca, dunjaluka i ahireta, između prava i dužnosti itd. Islam isključuje sve vrste ekstremizma i nepromišljenosti.
4. Islam se jasno prepoznaje po realizmu. To je jedna od

njegovih osnovnih karakteristika. On ne kruži u oblacima idealizma i prema ljudima se ne odnosi kao prema krilatim melekima, već kao prema ljudskim živim bićima, koja mogu biti pokorna, a i pogriješiti.

5. Islam ženi daje posebnu čast i mjesto u društvu, smatrajući je šeriatski obveznim ljudskim bićem, koje ima svoja prava i dužnosti. Islam ženu posmatra kao majku, kćerku, suprugu, sestru, jednostavno kao člana porodice i društva.
6. Islam na porodicu gleda kao na osnovnu ćeliju društva, a na brak kao na osnovu porodice.
7. Islam poklanja veliku pažnju odgoju i vaspitanju. Gotovo veću, nego li pravnom sistemu. Zdrava ličnost je garancija zdravog društva.
8. Islam društvenu zajednicu gradi na temelju bratstva, uvažavanja i tolerancije među njegovim pojedincima. Stoga nema mjesta rasnom, klasnom, nacionalnom, vjerskom ili međumezhebskom sukobu.
9. Islam ne poznaje klerikalizam. U njemu nema klase sveštenstva koje ima monopol nad vjerom i upravlja sviješću. U islamu nema posredništva između roba i Rabba. Islamska ulema je samo kategorija stručnih i kompetentnih ljudi u tumačenju dina. Biti alim ima svako pravo, ko želi izučavati nauku.
10. Islam daje puno pravo ummetu u izboru svojih vođa. Islam narodu ne nameće vladara koga ne želi i koji će tlačiti sopstveni narod.
11. Islam štiti pravo na posjed. Štiti imetak, koji je osnovna pretpostavka za izgradnju dunjaluka i za uspostavljanje dina. Imetak je Allahova blagodati, na kojoj čovjek mora biti zahvalan i riječima i pravilnim korištenjem. Imetak ne smije postati cilj, već je bio i ostaje sredstvo u službi islama. Mjesto imetku je u rukama, a ne u srcu.

12. Islam uzima u potpunu zaštitu slabije kategorije u društvu, radnike, seljake, zanatlije i niže službenike. Za ove kategorije postoji fond društvene solidarnosti sa posebnim izvorima.

13. Islamu ne smeta ljubav i ponos građanina prema svojoj domovini, prema svome narodu i naciji, sve dok to ne dodje u koliziju sa ljubavlju i ponosom prema Allahu i islamu.

14. Islam ideji suprostavlja ideju, a dilemi dokaz. Nema prisiljavanja u vjeru i nametanja mišljenja. Islam odbacuje nasilje kao metodu i terorizam kao sredstvo. Poziva na konstruktivan dijalog na temelju objektivnosti i poštivanja drugog mišljenja.

15. Islam nas uči da je Allah ljude stvorio različitim. (Da je tvoj Gospodar htio, On bi ljude učinio jednim ummetom)!

16. Islam se ne zadovoljava hvalospjevima o prošlosti svoje civilizacije, već od nas zahtijeva rad na planu izgradnje moderne islamske civilizacije.

17. Islamu nije najveća briga formalna primjena šeriatskih propisa, već smatra svojim temeljnim zadatkom uspostavljanje istinskog, a ne formalnog, islamskog načina življenja u svim društvenim segmentima.

18. Islam muslimane, ma gdje oni živjeli, smatra jednim jedinstvenim ummetom.

Islamische Gemenischaft Stuttgart
Islamska zajednica Stuttgart

Glockenstr. 6

D-70369 Stuttgart